

廣州府志卷八十九

古蹟畧七 寺觀二

東莞縣

資福寺在縣西一百六十步南漢大寶五年禹餘宮使邵廷

珣建周圍四井為界有羅漢閣宋元符三年比邱祖堂建閣

成走惠州求記於蘇軾惠有古舍利蘇公易以犀帶并藏閣

上與作偈及舍利塔銘再生柏贊按金通志再生柏以祖堂禪師去而枯迎師回而復

榮閣又名靈源閣嘉熙三年邑令許巨川修元至元二十年

毀大德至正間相繼修明洪武十三年圯改為法堂二十四

年設僧會司永樂十一年復圯復修天順七年正統十年又

修今為祝釐之所據輿地紀勝黃通志金通志東莞志參修

宋蘇軾羅漢閣記衆生以愛故入生死由於愛境有逆有順而生喜怒哀造種種業展轉六趣至千萬劫本所從來唯有一

愛更無餘病佛大醫王對病爲藥唯有一捨更無餘藥而治此病如水救火應手當滅云何衆生不滅此病是導師過非衆生咎何以故衆生所愛無過身體父母有疾割肉刺血初無難色若復鄰人從其求乞一爪一髮終不可得有二導師其一清淨不入諸相能知衆生生死之本能使衆生了然見知不生不滅出輪回處是處安樂堪永依怙無異父母支體可捨而況財物其一導師以有爲心行有爲法縱不求利卽自求名譬如鄰人求乞爪髮終不可得而況肌肉以此觀之愛吝不捨是導師過設如有人無故取米投坑穽中見者皆恨若以此米施諸鳥雀見者皆喜鳥雀無知愛我此施何異坑穽而人自然有喜有愠如使導師有心有爲則此施者與棄無異以此觀之愛吝不捨非衆生咎四方之民皆以勤苦而得衣食所得毫末其苦無量獨此南越嶺海之民貿遷重寶坐獲富樂得之也易享之也愧是故其人以愧故捨海道幽險死生之間曾不容髮而況飄墮羅刹鬼國呼號神天佛菩薩僧以脫須臾當此之時身非已有而況財物實同糞土是故其人以懼故捨愧懼二法助發善心是故越人輕施樂捨甲於四方東莞古邑資福禪寺有老比丘祖堂其名未嘗戒也而律自嚴未嘗求也而人自施人之施堂如物在衡損益銖黍了然覺知堂之受施如水涵影雖千萬過無一留者堂以是故創作五百大阿羅漢嚴淨寶閣涌地千柱浮空三成壯麗之極實冠南粵東坡居士見聞隨喜而說偈言五百大士栖此城南珠大貝皆東傾衆心同春柏再榮鐵林東來閣乃成寶骨未到先通靈赤蛇白壁珠夜明三卜龔吉誰敢

爭層簷飛空俯日星海波不搖颶無聲天風徐來韻流鈴一洗瘴霧冰雪清人無南北壽且甯

蘇軾舍利塔銘并序自有生人以來人之所見於世者何可勝道其鼓舞天下經緯萬世有偉於造物者矣考其所從生實出於一念巍乎大哉是念也物復有烈於此者乎是以古之真人以心爲法自一身至一世界自一世界至百千萬億世界於屈信臂頃作百千萬億變化如佛所言皆真實語無可疑者至於持身厲行練精養志或乘風而仙或解形而去使枯槁之餘化爲金玉時出光景以作佛事者則多有矣其見伏去來皆有時會非偶然者予在惠州或示余以古舍利狀若覆孟圓徑五寸高二寸重二斤二兩外密而中疎其理如芭蕉舍利生其中無數五色具備意必真人大士之遺體蓋腦之在顱中顱亡而腦存者予曰是當以施僧與衆共之藏私家非是其人難之適有東莞資福長老祖堂來惠州見而請之曰吾方建五百羅漢閣壯麗甲於南海舍利當棲我閣上則以犀帶易之有自京師至者得古玉璧試取以薦舍利若合符契堂喜遂并璧持去曰吾當以金銀琉璃爲窰堵坡置閣上銘曰真人大士何所修心精妙明含九州此生性海一浮漚委蛻如遺不自收戒光定力相承休結爲寶珠散若旒流行四方獨此留帶犀微矣何足酬璧來萬里端相投我非與堂堂非求其求佛事知誰由

瑞光一起三千秋永照南海通羅浮

蘇軾再生栢贊生石首肯樊松肘回是心苟真金石爲開堂去栢枯其留復生此栢無我誰爲枯榮方其枯時不枯者存

一枯一榮皆方便門人皆不聞
瓦礫說法今聞此栢熾然常說

慧雲寺在縣東二百五十步監南山原名修慧院南漢大寶
三年內承宣使劉廷威鑄鐘二百五十觔置院中後改慧雲
寺宋紹興二十三年邑令姚李資移置寺額於東莞鐘歸海
光寺後張勳取鐘還慧雲寺按張府志鐘明永樂間被盜竊去淳祐間重修
據張府志東莞志參修

謹案東莞志作寶祐元年修

覺華寺在縣西中堂村宋紹興間建今廢

慶林寺在縣南靖康烏沙村臥象山元至元間李春叟捨田

建

李春叟有記
俱同上

宏化寺在縣東榴花村銅嶺塔下邑人袁應文建今圯

據金通志

圓明寺在縣西門內嘉靖元年改爲社學

據東莞志

雁塔寺在縣東三十里茶園村嘉靖元年改爲社學

眞乘寺在縣東上寺岡今廢

法性寺在縣西三十里亭頭村今廢

普通寺在縣西五十里大甯村今廢

法華寺在縣東六十里福隆村今廢

蘭若禪院在石龍之南明崇禎間建

俱同上

圓應堂在樟村定光古佛香火地有黃山谷碑今廢

據張府志東莞

志參修

白馬廢庵在縣西十五里相傳舊有神人騎白馬見於此鄉

因名其地曰白馬建石塔以鎮之紹興間邑宰張勳始建新

庵後夢神人刻碑志其事

據張府志

圓通庵在縣東一里萬厯間醫士黃維堯募建雍正八年知

縣周天成重修

據東莞志

正覺庵在縣東郭白衣庵傍邑人李檣倡建

如庵在東湖庵側邑人張穆之捐地建

北畹庵在東湖庵前邑人尹源進建

金繩庵在城外脉瀝洲邑人趙孺偉捐地建

萬壽庵在縣東三十里茶山鄉後圯天啓間邑人陳其琛倡

修崇禎九年圯於水復建

楞伽庵在縣西五里大菴口明天啓間邑人何岷鎮張履初

張二果等結放生社於此

龍沙庵在石龍麵街明崇禎間建

俱同上

芥庵在篁村

國朝初空隱口口兩禪師建

據張府志

白衣庵在河田珊美坊邑人方廷珩建雍正六年增修

據東莞志

廣惠庵在石岡村邑人王應華倡建

然公庵在深溪龍潭上今廢

慈渡庵在縣北郭

東湖庵在城外東洲田貝涌邑人尹源進建邑人五日觀競

渡於此

俱同上

上清觀在縣西南道家山上宋政和二年知縣楊禕徙建山

下淳熙十五年知縣王中行重修歲久圯明洪熙二年道士

章貢與邑人陳似愚等重建陳璉記

據金通志張府志東莞志參修

青陽道院在城新涌鄉

國朝雍正二年邑人建知縣周天成題額今廢

據張府志東莞志參修

朝真道院在城隍廟側今廢

據東莞志

鎮象塔在縣西南資福寺前南漢時有羣象害稼官捕殺之

禹餘宮使邵廷琬聚骨建石塔以鎮焉高四尺有奇圍四尺

形八面上有觀音像下週遭刻記文及咒語凡千餘字據南海古

蹟記金通志張府志東莞志參修記文詳金石畧

雁塔在道家山宋淳祐間建邑有舉進士者題名其上明崇

禎十年邑人郭九鼎等修據郝通志

金鰲洲塔明知縣翁汝遇暨邑人戴記等建後圯乾隆二年

知縣印光任重建據張府志東莞志參修

銅嶺塔在龍潭峽水口據張府志

武山塔在虎門武山今圯據東莞志

順德縣

寶林寺在縣南鳳山之麓五代創宋開禧間鄉人嚴宗易更

新之明嘉靖間僧懷樹文照文覺重修

國朝康熙十一年僧元亮開叢林演法

據黃通志金通志張府志參修

隆福寺在西岸宋咸淳元年僧慧徹建明洪武二十四年修

嘉靖三十五年復修

據金通志

化樂寺在平步堡宋嘉熙四年周挺建明天順間何淮劉永平重修

國壽寺在水藤堡

地藏寺在古樓堡金斗村

福田寺在桂林堡北濠村

俱同上

興福寺在馬甯堡宋僧無本建

據順德志

金城寺在古樓堡鹿門村元創明嘉靖間僧宗演修久廢

慧雲寺在倫敦堡北海村順治十二年建康熙三十二年乾

隆三十七年道光九年屢修

竹林寺在吉祐康熙二年建嘉慶二十三年修僧靜光清淨
自守面壁數年一日隔壁語沙尼令備器皿掃除後五日當
有諸僧至如期果然

碧雲寺在碧江上馬峯康熙間蘇姓建乾隆二年修

國明寺在龍江堡乾隆初廢

庚流寺在仙岸卽荷村已廢

俱同上

積善庄在龍山宋貞女吳妙靜捨田光孝寺僧建

據龍山鄉志

慈度禪院在弼教明萬厯四十八年邑廩生黃元生捨長灣
路一畝與族弟元魯出家建此名仰素後黃尙用等捨地五
畝三分募化增建當時詩人開海西社於此

據順德志

謹案萬厯四十八年八月光宗改元泰昌此禪院當

建在八月以前故仍稱萬厯

錦巖庵在縣拱北門外石壁下倚石爲庵旁有石臺亭榭可

供吟眺

同上

抖塵庵在桂林鄉里人梁友聲建側有狂仙小祠梁廷佐記

據金通志阮通志參修

西華庵在城西西山下明僧白度者善詩畫頗饒野趣先官指揮使出征受傷去其右腕遂以左手持管鼎革祝髮爲僧於此寂後假爲僧會署旣而縣役又假爲羈留罪人之所

據順

德志

善慶庵在葛岸明景泰元年建

金粟庵在碧江大岡頭明景泰間建

圓山庵在龍眼圓岡建不知年有萬厯殘碑道光十一年修

圓通庵在龍眼永安山麓明天啓間建嘉慶九年修

地藏庵在赤花明季僧建樂善堂康熙初繼建維摩禪院乾隆二十五年以奉地藏改今名道光四年修又有地藏寺在金隄已圯

節勝庵在龍涌明季陳子達女爲尼建

福慶庵在西較場寶林寺前

俱同上

元真觀在縣南鳳山南宋真人羅務光修煉於此有紫霄圃

按張府志作金霄圃

藏真庵煉丹井洗硯池明景泰三年創天順間廢

爲察院行臺改建於寶林寺東

據黃通志金通志張府志順德志參修

謹案順德志作元妙觀而別著元真觀其實一也

眞慶宮在北郭外科第舖明萬厯三年知縣沈鈇建

據阮通志

從化縣

北山寺在縣城北門外

據金通志

太平寺在城東十五里楓園鄉

據金通志從化志參修

王樂寺在神岡

據從化志

懷聖寺在馬村

謹案從化志以上三寺俱有祀田明提學魏校毀之
今制庠陋祀田僧收如故

觀音庵在風雲嶺依觀音巖俯臨絕壑有時雲雨出其下
白衣庵在城東北五里邑人鄧超建

萬壽庵在城北元帝廟後千戶童斌建順治十八年知縣孫

繩重修

俱同上

帽峯庵在帽峯之頂神最顯赫云

據張府志

大士庵在縣城南藍田廟右康熙二十九年知縣郭遇熙建

典史王佐設亭於右曰見山亭

據從化志

文峯塔在參嶺上爲一邑水口之鎮明萬厯四十七年知縣張得春建久廢

國朝康熙三十二年知縣郭遇熙重建

據張府志

龍門縣

萬壽寺在城西門外明萬厯十二年知縣李萬甯建

據龍門志

華封寺

俗稱大王廟

在譚田堡離莘園里許相傳宋末有苦行僧

負神像謁此俄而再負不動土人驚訝以爲神依棲卽其地建寺嘉慶十一年里人梁鶴齡等捐修

水西塔在城東南五里凡七級明萬厯三十二年知縣張述齡創建三十八年知縣鄧汝楫繼成之

功武塔在城南六十五里明崇禎十四年里人廖衍泰建道

光初年功武廖姓重建俱同上

增城縣

萬壽寺在縣南鳳凰山之東舊名法空寺宋嘉熙元年按增城志

作嘉祐間僧鑑圓創為祝釐之所因名焉元季毀明洪武二十八

年僧祖榮重建設僧會司於此乾隆十二年嘉慶二十三年

屢修據黃通志郝通志張府志增城志參修

證果寺在縣東北三十里金牛都宋皇祐間賓道者削髮於

明山寺化於縣南瑞山石上因徙寺於瑞山之右據黃通志增城志參修

修

宋李昉英北山證果寺詩久聞北寺最清幽因看花田遂一
遊近郭好山半煙雨參天喬木幾春秋香凝永晝添談柄風
送長松爽茗甌此境今纔逢我輩不留詩去鶴猿羞

謹案張府志作證果寺蓋傳寫之譌

東林寺在楊梅都百丈約明萬厯中建

據增城志

西林寺在楊梅都密石洞順治中建

西竺寺在楊梅都米崗約順治中建

白花寺在縣西五十里南鄉山麓乾隆二十九年重修

俱同上

海門禪院在清湖都華峯距省治東南八十里峯巒疊聳高

數百仞康熙二十一年僧南樵構巢樹上里人爲闢禪院有

太古居十方嶺整衣臺觀瀑臺羅漢溪阿耨池聽琴石諸勝

南樵原江西進士明末至華峯削髮爲僧

據采訪冊

栖雲庵在雲母都白水邨

據張府志

明李德宿栖雲庵詩衆壑忽已暝遠近響清湍山中對僧定疎雨掩柴門柳暗猿猱集氣交風露寒攬衣中夜坐蘿月在

松端

迴龍庵在楊梅都鹽坑之北

後名米崗

明崇禎中建

據增城志